

SAAKK 28.10.2021

Sää'mtee'ğğ saaggjää'dteei Tuomas Aslak Juuso

Sä'mmlai tuõđâšvuõtt- da suävâdvuõttkomissio šiõttummuš 28.10.2021

Ärvvsa vä'ldminister Sanna Marin da Saa'mi ouddoumaž Veikko Feodoroff, šiõgg kiõççi, media ee'ttkeei.

Tä'bbe lij juõ'kknalla miärkteei pei'vv nu't sä'mmli'žže gu lää'dd õhtsažkâdda. Sä'mmlai tuõđâšvuõtt- da suävâdvuõttkomissio alttad mââmõõzzâst tuâjas, koon leä'p valmštõõllâm kuu'kk da tärkka õoutsââ'jest Sää'mtee'ğğ, Saa'mi siidsâbbar di Lää'ddjânnam riikk ee'ttkeejivui'm.

Sää'mtee'ğğ saaggjää'dtee'jen mu'st liâ suur vuârddmõõžž komissio tuõjju. Tuõđâšvuõtt- da suävâdvuõttprosee'ss miärktõssân lij odm. toobdsted da ärvvtõõllâd sä'mmlai historiaalaž da änn'jõõžž čârstummuž, mie'ldd loogee'l riikk suddeempoliikk, di vuõiggâdvuõđi neu'rnummšid. Lää'ssen prosee'ssest čio'lğgeet, mä'htt tät vaaikat sä'mmlaid änn'jõžääi'. Tuõđâšvuõđ čio'lğgeem mie'tt, komissio õõlgçi e'tkkeed, mä'htt õhttvuõđ sä'mmlai da Lää'ddjânnam riikk kõõsk di sä'mmlai kõõskâst vuaitčeš ou'deed pue'ttiäi'jest.

Tuâj liâ jiânnai da ij-ga prosee'ss šõõdd lee'd hiâlpâs sä'mmlaid, di ij-ni aainâs še laa'ddid. Sää'mtee'ğğ oudldõõ'sti saaggjää'dteei Tiina Sanila-Aikio lai'nn'jee'l: *"Tuõđâšvuõtt- da suävâdvuõttkomissio šiõttummuš i'lla rämm di ij-ni vuaittmõš. Tãn olggnee'ja tuei'mme ää'ljet tõ'nt, što jiâ ääi'jbuž kuânst peälšted sä'mmlai vuu'did da kulttuurid leäkku ri'jttjam mu'tted kiččlõõttmõõžžid assimilâ'stted sä'mmlaid vä'lddkultuu're. Komissio aalgummuš lij juõkkum pe'ccel podd teädl'i'žžen tõ'st, mä'htt määng jiâ jiiijjâz jie'llempââ'jest õstâm vuäžžad vuõiggâdvuõđ."*

Tuäivam kuuitâg, što tãn prosee'ss čõõđ mõõnmõõžžâst seu'rrai looppâst pue'rr. Tuäivam, što Sää'm-meer vuaitt komissio tuâj päai'k kiõtt'tõõllâd traameez nu't kollektiivlânji meeran gu persontää'zzest. Tuäivam, što tuõđâšvuõđ čio'lğummuš da kuâsttjee'jen tuejnummuš vie'kkat še lää'dd õhtsažkââ'dd vuei'nned historia šõõdmõõžžid sä'mmlai kiõččâmvue'jjest da tøn päai'k fi'ttjed pue'rben änn'jõž vue'jj.

Suvi West *Eatnameamet - Hiljainen taistelumme* dokumee'ntest kuulât määngai sä'mmlai jurddjid sää'm-meer vue'jjest Lää'ddjânnmest. Muu miõlâst dokumee'ntest sä'mmlai saakk tõ'st, što Lää'ddjânnam riikk i'lla ri'jttjeei naa'lin čõnnõõttâm sä'mmlai alggmeervuõiggâdvuõđi ouddnummša, lij čio'lğgas. Komissiost lij mie'rr raajjâd tuâjstes rapoort, koozz tõt kee'rjat pââjas taimme'tkkõõzzid. Vuäinam še samai vääžn'jen, što vuei'ttep luõ'ttjed tai taimme'tkkõõzzi jää'dteei konkreettlaž tääimid sä'mmlai säâ'j ouddnummšen jee'res taa'zzin lää'dd õhtsažkââ'ddest.

Leäm tääđvaž tõõzz, što vä'ldminister Sipilä leäi halltõspââ'jest vaalmâš altteed sä'mmlai tuõđâšvuõtt- da suävâdvuõttprosee'ss Lää'ddjânnmest. Še vä'ldminister Marin da suu halltõõzzâs liâ čuäjtam mi'jjid čõnnõõttmõõžžâs tãn prosee'sse, da haa'lääm spä'ssbõõššâd pukid prosee'ss vue'ssbeä'lid tãn rääl'jest ärrai õhtsažtuâjain ää'sš pirr. Tuäivam, što lää'dd õhtsažkââ'dd še veiddsubun puätt čõnnõõttâd tuõđâšvuõtt- da suävâdvuõttprosee'sse da, što pue'ttiäi'jest sä'mmla vuäžžče jie'lled sä'mmli'žžen čârstummužtää da juätkkjeei reiddšõõttmõõžž jiiijjâz kiõlâs da kulttuu'res seeiltummšes.

Looppâst haa'lääm vól tuäivted lekkvuõđ da viõggid tä'bbe nõõmeem komissaarid sij puõ'tti tuõjju.

Spä'sseb!